



24. januar 2007

Inatsisartut Suleriaasissaanni § 36 imm. 1 naapertorlugu apeqqutit uku Naalakkersuisunut apeqqutigaakka:

**Naalakkersuisunut apeqqutit nukingup atorluarnerunissaa pillugu.**

(Inatsisartuni ilaasortaq Lene Knüppel, Demokraatit)

**Pissutigisaq:**

Kalaallit Nunaanni illorpaaluit, nunaqarfinniunerusoq illoqarfinnilu minnerni, suli angallatit kissarsuutaat atorlugit kiassarneqarput, paasisinneqarnera naapertorlugu assersuutigalugu kissarsuummik uuliatortumit uuliatornerungaatsiarput paggernerusarlutilu uuliamillu atuinerat kissarsuummit uuliatortumit ajornerulluni.

Tassunga tunngatillugu nunaalluni uuliamik eqquussuisartoq pissutsit ajoraluartumik imaapput ikummatissat akii appariartorpasinngimmata. Ilimagaara inuiaqatigiit teknologiinut ikummatissanik atuilluarnerusunut aningaasaliippata ungasinnerusoq eqqarsaatigalugu kalaallit inuiaqatigiivnut akilerluarsinnaanerussasoq – minnerungitsumik nunap immikkoortuinut siunissami erngup nukinganik pilersorneqarnianngitsunut.

Aammattaaq isumaqarpunga nalornisoornartoqalersitsisoq manna aamma inuit peqqinnissaannit isigalugu tulluassasoq soorluttaaq aamma avatangiisinut politikkimit isigalugu tulluassasoq. Naalakkersuisut apeqqutikka pillugit eqqarsaataat soqutigalugit tusarnissai qilanaaraakka.

Eqqarsaatit taakku tunngavigalugit Naalakersuisunut apeqqutit uku akeqqugaluarpakka:

1. Nalunaarsuuteqarnerluni illut/inigisat qanoq amerlatigisut ullutsinni angallatit kissarsuutaat atorlugit kiassarneqartut? Ajornanngippat nalunaarsuutit taakku skema atorlugu saqqumiuteqquneqarput illoqarfiit nunaqarfiillu ataasiakkaat immikkoortiterlugit.
2. Siunissami inuiaqatigiinnut iluanaarutaasinnaasanerluni, soorlu ikummatissanik eqquussuinerup minnerulerneragut, illut/inigisat taakku tamarmik siunissami soorlu kissarsuummik uuliatortumik imaluunniit innaallagissiorfeeqyanik nillorsaataa illunut kissassaatitut atorneqartunik kiasarneqarsinnaasuuppata? Tamanna soorunami sanaartornerinut aningaasartutissanut naleqqiulugit?
3. Naalakkersuisut apeqqut 2 angersinnaappassuk illumik piginnittumut nalinginnaasumut kissarsuummik uuliatortumik ikkussinissaq qanoq akeqarsinnaaneranik naatsorsuummik piumavunga. Tamanna akisussappat, soorlu 40.000-50.000 kr., naliliinera naapertorlugu illuutillit arlaqartut immaqa annerusumik nunaqarfinni illoqarfinnilu minnerni najugallit aningaasartuutit taamaattut kreditforeningikkut aningaaserivikkulluunniit namminneq aningaasalersorsinnaanissaannut mat-tunneqassapput.
  - a) Naalakkersuisut iluaqutaasinnaassangatinnerlugu qulaani taaneqartoq illuutilinnut amerlasuunut atuutissappat arlaannik iliuuseqarnikkut inuiaqatigiit aningaasaleeqataanissaanik aaqqissuuussineq pilersinneqarpat, innuttaasut taarsigassarsisitsisarfiit namminersortut aqqutigalugit aningaasaliinissamik periarfissaqannngitsut aningaasatigut tamakkiisumik sunniuteqarnissaata millisarnissaanut iluaqutaasinnaasumik?



4. Ilulissani innaallagissiorfeeraq nillorsaataa illunut kissassaatitut atorneqartoq misiliutitut pilersineqarmat pitsasunik misilittagaqarfingineqarnerluni, akilersinnaassuuseq/ ikummatissamik atuilluassuseq ilanngullugit?
5. Nunani allani innaallagissiorfeeqqanik nillorsaataa illunut kissassaatitut atorneqartunik misiliutinik tassunga assersuunneqarsinnaasunik Naalakkersuisut nalunngisaqannginnerlutik?
  - a. Taamaappat: Naalakkersuisut misilitakkat taamaattut pitsaasumik kalaallit nukisiornermi pilersaarutaannut ataavartumut ilanngussinnaasutut nalilernerlugit?
6. Illu angallatip kissarsuutaanik kiassarneqartoq illumut centralvarmemik uunnaavittalimmik kiassarneqartumut naleqqiullugu uuliatornera anginerunerluni taamaappallu qanoq anginerutigismik?
7. Agguaqatigiissikkaanni angallatip kissarsuutaanik piginnittoq aamma centralvarmemik uunnaavittalimmik piginnittoq ukiumut ikummatissamut qanoq aningaasarutuuteqartigippat?
  - a. Ilmagissallugu tulluassanerluni inuit najukkaminni angallatip kissarsuutaanik kiassarneqartut agguaqatigiissillugu nalunaarsukkanik A-nik isertitaqartartut akisarsiassat minnerpaaffissaanniittunik taakkunanggaluunniit ikinnerusunik?
8. Naalakkersuisut paassisutissanik peqarnerlutik angallatit kissarsuutai atorlugit illunik kiasaaneq peqqissutsimut ajoqtaasinnaanersoq pillugu, soorlu aniatitsinerit kingunerisinnaasaannik torluukkut/puakkut nappaatinut tamalaanut qaninnerulerneq?
  - a. Taamaanngippat, Naalakkersuisut tamanna misissornialersaernerlugu?
9. Angallatit kissarsuutai illut kiassarnerannut atorneqartartut pillugit qanoq issusiannik nalilinermik ullumikkut peqarpa? Taamaanngippat, Naalakkersuisut iluaqutaassangatinnginnerlugu qanoq issusiannik naliliinermik taamaattumik suliarititsissallutik – immaqa maannangaaq allanik taarsiinissanik pisariaqartitsinerup qanoq angitiginerata paasilluarnissaa siuertaralugu.
  - a. Taamaanngippallu, suna peqqutigalugu?
10. Naalakkersuisut ukiuni aggersuni suliniarnernik aallarniinissamik siunertaqarnerlutik ikummatissanik atuilluarnerunissaq siunnerfigalugu, tassungalu tunngatillugu aamma angallatit kissarsuutaannik illuni/najukkani kiassaanermut atorneqartunik taarsersuinissaq siuarsarniarlugu?
  - a. Imaluunniit Naalakkersuisut suliassaq tamanna aserfallatsaaliiinernut ingerlaavartumut peqatigitinnerunerlugu?
11. Ikummatissat akiisa qaffasinnerat peqqinnissamullu ajoqtaasinnaanerat eqqaallugit Naalakkersuisut tunngavilersuutitut atorneqarsinnaatinnerlugu inuiaqatigiit suliassarisariaqaraat angallatit kissarsuutaat illuniittut kiassatinik allanik taarserneqarnissaat inuiaqatigiit aningaasaqarniarnerannut aammalu inuup nammineq aningaasaqarniarneranut iluaqutaanerusunik?



12. Nukissaq qanoq angitigisoq Kalaallit Nunaanni illut kiassarnerannut atortarparput kallerup inneranut nukimmik atuinermut naleqqiullugu? Apeqqut immikkoortukkuutaartunngorlugu akeqquneqarpoq soorlu aalisakkanik suliffissuit, najugaqarfiiit, ataatsimut kallerup inneranik kiassarnermillu pilersuineq il.il.
13. Naalakkersuisut paasissutissanik peqarnerlutik agguaqatigiissillugu ukiumut kissarsuummit uuliatorumit aamma angallatip kissarsuutaanit aniatitsinerup qanoq angitigineri pillugit?
  - a. Taamaanngippat, Naalakkersuisut paasissutissanik taamaattunik paasiniaanialer-saarnerlutik? Paasisat taamaattut ukiuni aggersuni nukingup atornissaanik piler-saarusiornermi pingartinneqassappat?
14. Naalakkersuisut paasissutissanik peqarnerlutik maannakkut aniatitsinerit ulorianartut tamar-miusut kissarsuummit uuliatorumit angallatillu kissarsuutaannit illunik kiassaanermut ator-neqartut pillugit?
  - a. Taamaassimappat aniatitsineq tamanna avatangiisit eqqarsaatigalugit akuerineqar-sinnaasumiinnerluni?
15. Naalakkersuisut allanik paasissutissiisinnaanerlutik ikummatissanik atuilluarnerunissamik politikkikkut anguniakkat pillugit?

Inussiarnersumik allakkiap matumap tiguneraniit ullut 14 qaangiutsinnagit akeqquneqarpoq.